

Gwn ngaiz gvaq le, Dahfung coi gou bae swiq ndang, lij bang ra dauq buhvaq ndeu daeuj hawj gou rieg, naeuz sien ndeindei yietnaiq haemh he, haetcog caiq hawj cienz hawj gou.

Aenvih baeg lai, ngamq 8 diemj lai cung gou couh baiqinz lo, hoeng dou rug lij gven ndaetndwt. Dahfung lij caengz siengj deuz bae. Gou saedcaih dingj mbouj ndaej lo, couh naeuz: “Fung, gou baiqinz lo, mwngz hix bae yiet ba!”

Seizneix, Dahfung fwt coemj gvaqdaej got gou ndaetndwtndwt bae. Gou lumj ndaek gyaenghguen ndeu mbouj rox baenzlawz guh, cij roxnyinh dahde daenj geu buh mbangmbetmbet, ndang de youh unq youh raeuj, nemz dwk gou yaek diemheiq mbouj ndaej bae. Gou simvueng dwk cak bae cak dauq, naeuz: “Fung, gaej baenzneix guh, baenzneix guh deng gvan mwngz rox



couh mbouj ndei lo……”

“Ndaek haenx caeux couh ndek gou bae aeu yahnoix lo.” Dahfung raemxda conh okdaej lo. “Dangh-naeuz mwngz mbouj yiemz gou

uekcuek, haemhneix gou couh youq neix buenx mwngz.”

Baez raen raemxda, sim gou couh unq lo……

Haetlaeng gou hwnqdaej, Dah-

fung mbouj rox bae gizlawz lo, cij raen aen byuksaenq ndeu cuengq youq aen daiziq gyaauj mbonq. Gou dawz aen byuksaenq daeuj hai yawj, baihindaw miz 5 bak maenz ngaenz caeuj mbaw ceijdiuz he. Gwnz ceijdiuz sij naeuz:

Haemhlwenz roeb daengz beix
Nuengx haengjheiq lailai
Lumj raemxrongz dongj fai
Maengx yaek dai yaek lix

Dahfung deuz lo, caiq hix mbouj dauqma aen bouqdozhek haenx lo. Gou gvaqlaeng bae aen bouqdozhek haenx ra de geij baez gvaq cungj mbouj raen. Geij bi gvaqbae, de hix mbouj dauq ranz de gvaq. Gwnzbiengz gvangqlangh, vunz baenzzyoz, gou bae gizlawz cij ra ndaej raen de ya! Aiq baez doxbiek, couhdwg ciuh neix caiq hix mbouj ndaej raen lo.

(sat)

Bouxhuk Mizseiz Hix Gvai

愚人有时也聪明

□ Hoz Cunghliuj / 何宗柳

Mbanjdaminj miz bouxvunz he heuhguh Daeghuk. Daeghuk youq ndaw ndang meh de ngamq 8 ndwen buenq couh okseiq lo. Daeghuk miz di ngawz, ndaw uk de siengj maz mbouj rox, caeuj caezgya cungj mbouj doxdoengz, baeznaengz lumj aen cifaiggeu, baed couh cienqlulu, mbouj baed couh mbouj rox doengh lo.

Daeghuk 8 bi cij rox gangj vah, daengz 30 bi cij rox guh hong, ciengz miz vunz heuh de bae bang hong. Miz haujlai baez, Daeghuk youq ndaw mbanj bang vunz guh hong, yaek ndaej gwn haeux seiz, de lij guhcaeg baema ranz de gwn. Bouxkawj daeuj heuh de, de naeuz: “Mbouj bae, mbouj bae, ranz gou guh ndaej gvaq!” Nyex ndaej gyoengqvunz cungj riu hwnjdaej.

Daeghuk couhdwg baenzneix ngawz, hoeng miz saek seiz de hix gvai dangqmaz.

Miz bi he, meh Ahyinh baenz bingh yaek dai, de gig siengj raen naj Ahyinh mbat ndeu. Seizhaenx, Ahyinh youq ndaw singz guh hong dajcaep, boh de dwk denva heuh de dauq, de mbouj swt. Boh de baij beixnuengx bae heuh de dauq, de hix mbouj ma. Daeghuk rox le, naeuz: “Ngoenzcog sou dawz soujgih boh de daeuj, gou daj hawj de, de itdingh dauq.” Haetcaeux ngoenz daihngaih, Daeghuk dwk denva hawj Ahyinh, naeuz: “Haetneix boh mwngz youq ndaw suen vat ndaej gim, mwngz vaiq di dauq, saenq mbouj saenq youzcaih mwngz!” Ahyinh ciep ndaej denva, laihnaeuz dwg caen, laj-byonghngoenz couh dauq ranzmbanj. Daeghuk youq bakdou ranz de caj de, raen de couh naeuz: “Boh mwngz mbouj youq ndaw suen vat ndaej gim gvaq, gou yaeuh mwngz ndwi. Hoeng, aensim lwghauq couhdwg gim, bae yawj daxmeh mwngz ba, de ciengx mwngz hung mbouj yungzheih, seizneix baenz bingh naek mbouj rox ngoenzlawz dai, couh siengj caiq raen mwngz baez he.”

Ahyinh najmong dangqmaz, haeuj ndaw rug bae yawj daxmeh de. Daxmeh de baez raen naj de, bingh sikhaek ndei dingz ndeu.

Miz mbat he, Daegngeih heuh Daeghuk bang gaj duz ma ndeu. Aeuq cug le, Daegngeih couh mbat youh mbat bae cingj Aubet daeuj gwn nohma. Aubet nyengh mbouj daeuj. Caezgya cungj rox, Aubet gig maij bang vunz guh saeh hoeng mbouj gouz ndaej maz hoizbauq, de hix bang Daegngeih caep gvaq cibgeij ngoenz laeuz moq, mbouj aeu faen cienz ndeu. Danghnaeuz de rox Daegngeih vih saeh neix cingj de gwn nohma, haengjdingh mbouj daeuj. Daeghuk doiq Daegngeih naeuz: “De mbouj rox gou gaj mbouj gaj ma, raeuz dawz laeuj noh bae ranz gou gwn. Gou bae cingj de, bauj de daeuj!” Caezgya cungj doengzeiq yienghneix guh.

Daeghuk bae doiq Aubet naeuz: “Aubet, mwngz ndaejhoengq lwi? Haxbaenh gou cawx ndaej go bah hung he dauq, bae bang gou ram haeuj ranz, baenz mbouj baenz?” “Dwgcaen? Seizlawz bae?” Aubet cam. “Seizneix couh bae, yaep ndeu gou lij miz saeh wnq yaek bae guh, mwngz bae couh rox caen mbouj caen.”

Aubet gaen Daeghuk bae daengz bakdou ranz Daeghuk, Daegngeih caeuj gyoengqvunz couh okdaej itheij rag de haeuj ndaw ranz bae. Daeghuk doiq Aubet naeuz: “Aubet, doiq mwngz mbouj gvaq lo, gou mbouj cawx ndaej bah, cijdwg heuh mwngz daeuj gwn nohma hane. Beixnuengx doengz gwn laeuj gig nauhyied, mwngz couh gaej deuz lo.” Caezgya dingq le, riuho ho hwnjdaej. Aubet hix mbouj ndei caiq doiswz. Miz daeg he naeuz: “Neix caen dwg ‘Bouxhuk niemh cien baez, cungj miz gienh saeh he guh ndaej deng’ bw! Baezneix yawj hwnjdaej, bouxhuk miz saek seiz beij bouxcoengmingz lij gvai bw.”



Miz ndaek vunz ndeu haenq gwn gik guh, 40 geij bi lo cungj aeu mbouj ndaej yah, baenzngoenz cungj dwg doeng bae sae dauq, ndaw mbanj ranz lawz miz gwn de cengdi daengz henz, caemhcaiq ndaek vunz de gig vaddaeuz.

Dangdieg miz aen gvenq ndeu, gwn laeuj mwhhaenx, aen congz he mboujguenj naengh geijlai vunz, cungj dwg doxlwnz ndenq gvaqbae, ciengzseiz dwg boux ndenq laeuj gaxgonq dauqfanj ndaej gwn laeuj ceiq laeng. Hoeng, ndenq daengz de gwn seiz, de hix mbouj ndenq roengzbae lo, gag gwn byaek noh hwnjdaej. Ndigah, gyoengqvunz youq baihlaeng de cungj mbouj ndaej gwn laeuj, hix mbouj ndei gangj okdaej, cijndei caj daengz lwnz daihngaih lo.

Miz ngoenz he, ndaw mbanj

baihsae miz ranz he haeuj ranz moq cingjhek, de mbouj vaiq mbouj menh, vunzlai roengz naengh seiz de cij daengz, goq daengz aennaj, bouxkawj hix mbouj ndei gyaep de deuz, couh hawj de cab roengz congz he bae naengh. Baezneix, gyoengqvunz gaenq doxyaeng aeu cingj de baez ndeu. Ndigah, laeuj ndenq daengz boux mbiengjswix de gwn liux couh mbouj ndenq hawj de lo, boux mbiengjgvaz de yawj de mbouj haeujsim seiz gig vaiq couh iet fwngz bae aeu boi laeuj ndaw fwngz bouxvunz naengh youq mbiengjswix de, ndoet liux doq ndenq roengz boux laeng bae. De yawj daengxgyoengq cungj ndaej gwn laeuj, hainduj dawz dawh gwn byaek, cij de mbouj ndaej gwn, gip ndaej de heuh sing hung he: “Gou ne?” Hawj daengx congz vunz riuhumhum hwnjdaej.